

Uunga siunnersuut: Utoqqalinersiaqarneq pillugu Inatsisartut inatsisaata aamma Siusinaartumik pensionisiat pillugit Inatsisartut inatsisaata allanngortinneqarnerat pillugu Inatsisartut inatsisaat
(Isumaginninnermut Sulisoqarnermullu Naalakkersuisoq)

Saqqummiussissut
(Isumaginninnermut Sulisoqarnermullu Naalakkersuisoq)
Siullermeerneqarnera

Utoqqalinersiaqarneq pillugu Inatsisartut inatsisaata aamma Siusinaartumik pensionisiat pillugit Inatsisartut inatsisaata allanngortinneqarnerat pillugu Inatsisartut inatsisissaannut siunnersuut matumuuna Naalakkersuisut saqqummiuppaat.

Utoqqalinersiaqarneq pillugu Inatsisartut inatsisaanni aamma Siusinaartumik pensionisiat pillugit Inatsisartut inatsisaanni inatsisip oqaasertaasa allanngortinneqarneri immikkoortut marluk siunnersuummi ilaapput.

Siusissukkut utoqqalinersiaqarsinnaatitaaneq allannguutip aappaani pineqarpoq allannguutillu aappaani utoqqalinersiaqarneq siusinaartumillu pensionisiat pillugit akigititanik naatsorsueriaaseq pineqarluni. 2018-imut 2021-mullu aningaasanut inatsimmi oqaasertaliussat malillugit allannguutaasut akuerineqareersut naapertorlugit inatsisip oqaasertaanut allannguutit marluullutik naleqqussaanerupput.

Innuttaasut siviisuumik timikkut tarnikkulluunniit oqimaatumik suliaqarsimanertik pissutigalugu nungullarsimasut suli isumagineqaannarnissaat 2021-mut aningaasanut inatsit aqutigalugu Inatsisartut kissaatigalugu oqaatigisimavaat.

Taamaalilluni inuttaasunut 65-inik ukioqalersimasunut, utoqqalinersiaqalernissamik qinnuteqarnissaannut nalinginnaasumik 67-inik ukioqarnissamat piunasaqaatip avaqqunnissaanut periarfissiisoqarpoq, sivikinnerpaamik ukiuni 35-ni sulinerup kinguneranik timikkut tarnikkullu nungullarsimaneq pissutigalugu siusissumik utoqqalinersianik tunniussisoqalersinnaalluni. Eqimattaq taanna immikkut ittoq taamaalilluni utoqqalinersianik qinnuteqarnissamat annertusisamik periarfissaqalerpoq.

Utoqqalinersiaqarneq pillugu Inatsisartut inatsisaata naleqqussarneranik siunnersuut imaqarpoq, 2021-imut Aningaasanut inatsimmi malittarisassanut akuerineqareersunut inatsimmi oqaasertaliussat ileqqussanut naapertuutilersinneqarlutik.

Utoqqalinersiaqarneq pillugu Inatsisartut inatsisaanni aamma Siusinaartumik pensionisiat pillugit Inatsisartut inatsisaanni inatsisip oqaasertai peqatigitillugu naleqqussarneqarput, pissutigalugu akigititanik nalimmassaanermut nalunaarsuut tunngaviginagu procentinulli aaqiissutissaq tunngavigalugu siumut sammisumik akigititat nalimmassarneqassasut 2018-imi Inatsisartut aalajangiimmata.

Siunnersuummi ataatsimoortut marluusut siunertaraat inatsisip oqaasertaanut
naleqqussaanissaq, taamaalilluni innuttaasunut sullissisunullu malittarisassat
paasiuminarnerulissammata ersarinnerulerlutillu.

Taamatut oqaaseqarlunga saqqummiussissut Inatsisartunut oqaluuserisassanngortippara.